

SANTIAGO

KARTA KACHASKAMANDA

1 ¹Nuka, Taita Diuspa i Iaia Jesucristopa lutrinsina kaspera, Santiagomi suti kani. Ñugpamanda taita Israelpa chungar iska wambrakunapa wambrakuna maipi kausanakuskata: Puangimi niikichita.

Llakii chaiaura, mana sambaiaspalla kangapa niskamanda

²Taitakuna i mamakuna, kamkunata achka llakiikuna chaiauraka, mana llakiiwa kagsina suma alli iuiachiriiwa kangichi, ³kasa iuiaripa: kamkuna Iaia Jesuswa iuiarinakugta sug rigcha iuiakuna chaiaikugpika, chaianmi, mana sambaiaspalla paillawa iuiarikungapa, ima kagpipas. ⁴Iaia Jesuswa chasa iuiarispalla mana sambaiaspalla kagpika, iukangichimi tukui allilla iuiapi kanga, ñi ima mana kungarispalla.

⁵Maikanpas, allilla iachaita mana iachaspaka, Taita Diusta mañaichi. Chasaka chaskinkangichimi. Taita Diuska, tukuikunatami ima mañaska mana tupuspalla kará, mana piñarispalla. ⁶Taita Diusta mañakuuraka, paita suma iuiaripa mañaichi, mana kasa iuiarispalla: “¿Karawangachu u manachu karawanga?”. Mana allilla iuiapi mañagka, wairawa iaku kuchata kaima chima kuiuchispa apakugsinami rurá. ⁷Maikan chasa mañagka *mana iuiakuchu: “Atun Taita Dius, imapas karawangami”. ⁸Chi runaka, sug rigcha sug rigcha iuiaspa, ima rurai kallariskatapas mana puchukadurmi tukú.

⁹Maikanpas kampuramanda mana iukag kaspaka, alli iuiachiiwa kachu. Paikunataka, Taita Dius kikin kawag sumami atuniachingapa ka. ¹⁰Chasallata, maikan iapa iukag kaskataka, Taita Dius kikinmi paitaka uchullaiachingapa ka. Chasa kagpipas, alli iuiachiillawa iuiakuchu. Iapa iukagka, ugsa tugtusinami mana unaila wañuringapa ka. ¹¹Indi llugsispa rupariuraka, ugsakunata chakichinmi. Tugtukunatapas urmachinmi. *Chiwanka, tukui suma kawari puchukarinmi. Chasallata iapa iukag runa, ima tiaska i iukaska sakispa, chi tugtusinami chingarí.

¹²Jiru rurangapa iuiakuna chaiauraka, mana chasa ruragkunaka Taita Diuspa iapa kuiaskami kankangichi. Chi mana jiru ruragkunaka, alli

suma kaugsai primiutami chaskigrinkangichi. Chi kaugsaitaka, Taita Dios nirkami, paíta *kuiagkunata karangapa.

¹³Maikantapas jiru rurangapa iuiakuna chaiauraka, *mana iuiariku-chu: “Taita Diosmi chi jiru iuiaita iuiachiwaku”. Ñi pipas mana Taita Diusta iuiachinkunachu, jiru rurangapa. Chasallata Taita Dioska, ñi pitapas mana iuiachinchu, jiru rurangapa. ¹⁴Chi jiru rurangapa iuiakunataka, tukuikuna iukanchimi nukanchi kikinpa iuiailapi. Chasaka nukanchita iuiachispa, jiru ruraitami munachí. ¹⁵Chimandami nukanchi jiru ruraikunata ruranchi. Chasa jiru ruraskakunamandaka, Diospa ñawipi wañuimi tarinchi.

¹⁶Nukapa iapa *kuiaska taitakuna i mamakuna, *mana pandaringichi. ¹⁷Tukui suma iuiakuna i ima ministiskakunata, Taita Diosmi suma luarmanda karamú. Paimi ka tukui punchaiachigkunata rurag. Paika, imaurapas paillami ka; punchallami ka. ¹⁸Pai kikin munaspalla, paipa rimaiwa nukanchita mana puchukaridiru suma kaugsaitami karamurka. (Chi rimai, tukuipi sutipami ka.) Chasaka, tukui pai ima wiñachiskakunamanda, nukanchi paimanda ñugpa kispichiska kangapa.

Sutipa rimaskakunata uiaspa, allilla rurangapa niskamanda

¹⁹Nukapa iapa *kuiaska taitakuna i mamakuna, kasa uiawaichi: tukui kamkuna, Diospa Rimaita allilla uiangichi. Allimanda iuiarispá rimangichi. Chasallata, rabia chaiaura, *mana utkalla rabiaringichi. ²⁰Rabiariska runaka, Taita Dios munaskata mana ruranchu. ²¹Chimanda, tukui millai ruraikunata i mana allilla kaugsakunata sakiichi. Diospa Rimai uiaskata upalla chaskiichi, mana atuniachirispalla. Chi Diospa Rimaiwaka, kamkuna suma iuiarigkunatami kispichingapa ka.

²²Diospa Rimai iasa willaraiaskasina rurangichi. *Mana ianga uiaspalla kangichi. Ianga uiaspalla kagkunaka, kikinkunami iuianakú: “Allillapimi kani”. Nigpika, mana chasa kanchu. ²³Maikan Diospa Rimaita uiaspapas, mana chasa ruragkunaka, paipa ñawi imasa kaskata ispijupi kawarigsinami kankuna. ²⁴Chasa kawaspaka, kikinpa ñawi imasa kaskata mana unaillami kungarinkuna. ²⁵Ikuti maikanpas, Taita Dios ima niskata uiaspa, mana kungarispalla umapi wakachispa ruragpika, chi runaka, Taita Diospa iapa kuiaskami kanga, chasa ruragmanda. Taita Dios ima niskaka, tukuipi allillami ka. Chasa niskata uiaspa ruragkunaka, wataraiaska kaskamanda kachariskasinami tukunkuna.

²⁶Maikanpas paipa simita^a mana upallachigpika, pai kikinlla, pandarispá, iangami iuiaku: “Nuka, Taita Dioswami kani”. ²⁷Taita Diospa ñawipi, maikan imapipas paiwa suma iuiarigkuna, kasa ruraspami kaugsankuna: wagchukunata i llakiwa kag sapalla kidaska warmikunata tukuipi aidaspa; chasallata, kai alpapi ima jiru ruraikunata mana imapas ruraspalla.

^a 1.26 griego rimaiwa: kalluwa

Suglla iuiiai runapura tiachu

2 ¹Kam taitakuna i mamakuna, nukanchipa suma Iaia Jesucristowa iuiarigkuna kaspas, sugkunata sug rigcha sug rigcha iuiaiwa *mana kawangichi. ²Kasa iuiarisunchi. Kamkuna sugllapi tandariska kaskapi iaikugsamuchu sug runa, kuri surtijawa i suma musu katangawa. Chasallata sug mana iukag runapas iaikugsamuchu, ruku katanga churariska. ³Chiura kamkunaka, chi suma churariska iaikugta suma rimaiwa aillas-timaspas ninkangichimi: “Samui. Ñugpa ladu tiarigsamui”. Ikuti mana iukagtaka ninkangichimi: “Chillapi saiakui” u “Alpapi tiarii”. ⁴Chasauraspami kam kikipura sug rigcha sug rigcha iuiaiwa kawanakungichi. Mana sugllasina iuiarispami sugkunataka mas sumaglla kaianakungichi.

⁵Nukapa *kuiaska taitakuna i mamakuna, kasa iuiariichi. Kai alpapi mana iukag kagkunatami Taita Dios agllarka, paikuna, Jesucristota suma iuiari-iwa iapa iukagsina tukungapakuna; *chiwanka paikunapas, Taita Dios suma mandakuskapi iaikugringapa. Chasami Taita Dios nirka, paita *kuiagkunata karangapa. ⁶Ikuti kamkunaka, mana iukagkunataka mana balitasinami kawangichi. ¿Manachu chi iapa iukagkunaka, kamkunata imapipas mana allilla charinkuna? ¿Manachu paikuna, kamkunata justisiakunapagma ali-uspa apachinkuna? ⁷¿Manachu paikuna, Iaia Jesucristopa suma sutimandapas jiru rimankuna? Ikuti kamkunaka, Iaia Jesusmandallami sutichiska kangichi.

⁸Taita Dios imasa kaugsangapa niskapi, kasami willaraiá: “Kam kikintasinami iukangi, tukui runakunatapas *kuianga”. Kamkuna chasa ruragpi, allillami runanakungichi. ⁹Ikuti runapura sug rigcha sug rigcha iuiaiwa kawagpika, atun pandariimi runanakungichi. Chasa ruragpika, Moisés sakiska willaraiaskapi niraiami, kamkuna mana allilla ruraipi urmagtakuna.

¹⁰Tukui imasa Moisés sakiska willaraiaskasina rurakuspapas, sugllapas chi willaraiaskata pandarigpika, tukui chi willaraiaskakunatami mana allilla ruragsina tukungapa ka. ¹¹Kikin Taita Diosmi ni: “*Mana sugpa warmi-wa kariwa siriringi”. Kasapasmi nirka: “*Mana wañuchingi”. Kamkunaka, mana sugpa warmiwa kariwa siririspapas, maikanta wañuchigpika, tukui chi willaraiaskakunata mana allilla ruragsinami tukugsamungichi. ¹²Suglla willaraiaskapika tianmi, kamkuna kispiringapa. Chi willaraiaskawami kamkuna justisiai tukungapa kangichi. Chasa iachaspaka, iukangichimi tukuipi allilla rimaspa i ruraspas kaugsanakunga. ¹³Maikan sugkunamanda mana llakigpika, Taita Diospas mana llakispallami paikunata justisiangapa ka. Ikuti maikanpas sugkunamanda llakispa suma ruragkunaka, justisiai puncha paita chaiauraka, tukuipimi allilla llugsingapa ka.

Taita Dioswa iuiariillawa mana chaianchu; allilla ruraimi chaia

¹⁴Taitakuna i mamakuna, maikanpas iuiarichu: “Taita Dioswa suma iuiarigmi kani”: chasa iuiariillawa kaspaka, ñi ima allilla mana ruragpika,

¿imawatak kawachinga, suma iuiarig kagta? Pai chasa iuiariillawa sug luarpi mana kispirigringapa kanchu. ¹⁵Kasa iuiarisunchi: maikanpas kam kikinpura mana katanga iukachu, ñi mikui mana tiapuchu. ¹⁶Chasa mana iukaskataka, maikan kampura nintra: “Apaijim. Alli katanga churaringi. Wigsa jundagta mikungi. Kunaura riilla”; chasa nispaka, ñi ima mana karaspalla kachagpika, ¿imatak allilla ruragta niraiá? ¹⁷Chasallata, maikanpas iuiarichu: “Taita Dioswa suma iuiarigmi kani”: chasa iuiailawa kaspaka, ñi ima allilla mana ruragpika, chi iuiarii, wañuskasinami niraiá.

¹⁸Maikan ningami: “Kam, Taita Dioswa sumasi iuiaringi. Ikuti nukaka, tukui allillami rurani. Kam, ñi ima allilla mana ruraspapas, kawachiwai paiwa suma iuiarikugta. Ikuti nukaka, allilla ruraskawami kawachisaki, nuka paiwa suma iuiarig kagta”.

¹⁹Suglla Taita Dios tiagta kam iuiagpika, allillami ka. Kuku wairakunapasmi chasallata iuiankuna. Chasa iuiarispaka, dimanchaimi chugchurinkuna. ²⁰*Mana upasina kai. ¿Manachu kasa iuiaringi? Kam ñi ima mana allilla ruraspalla kaugsakugpika, kam iuiantrangi: “Taita Diosllawami kani”; chi iui aika, ñi imapa mana balinchu; wañuskasinami niraiá.

²¹Nukanchipa ñugpamanda taita Abrahamka, ¿manachu paipa wambra Isaakta altarpí rupachingapa churaskamanda, Diospa ñawipi alli runa kagta kawarka? ²²¿Manachu iachangichi: Abrahamka, chasa ruraspa, pai Taita Dioswa suma iuiarig kagta kawachirirka? Chasa ruraspami pai imapipas suma iuiarig tukurka. ²³*Chiwanka, ñugpamanda librupi imasa willaraiaskasina tukugsamurka. Kasami niraiá:

Abrahamka, Taita Dios imasa niskata iuiarispami karka:
“Chasami tukunga”.

Chimandami pai mana pandarig niraiarka.

Paitaka, Taita Dios kikin nirka:

“Kuiaskami kapuangi”.

²⁴Chimandami niikichita: maikan runa Taita Dioswa iuiarispallaka, paipa ñawipi mana allilla niraianchu. Paiwa suma iuiarispaka, allilla rurasakunawami mana pandarig tukugsamú.

²⁵¿Manachu chasallata sug karisapa warmi, Rahab suti rurarka? Chi warmika, iskaí Israelmanda runakuna chi puiblupi pakalla chapaspa purinakuskata paipa wasi ukuma pakakuchirkakunata. Nispaka, sug ñambita llugsichirkakunata. Chasa allilla ruraskawami chi warmi mana pandarig tukugsamurka.

²⁶Imasami, alma llugsiura, kuirpu wañuska ka: chasallata maikanpas, Taita Dioswa iuiariillawa kaspaka, ñi ima allilla mana ruragpika, chi iuiarii, wañuskasinami niraiá.

Simiwa rimaskamanda

3 ¹Nukapa *kuiaska taitakuna, kampurakuna *mana munangichi, achkakuna Diospa Rimaita iachachigkuna tiangapa. Kasa iuiarisun-

chi: nukanchi iachachigkunaka, sug luarpika sugkunamandapas masmi tapuchii tukungapa kanchi. ²Tukuikunami achka imapipas pandarinchi. Maikan mana pandarispalla rimagka, chi runakar tukui imapipas allillami ka. Paika, paipa kuirputapasmi mana sakinga, ñi ima jirukunata rurangapa.

³Kaballupa simita prinumi wataspa churanchi. *Chiwanka nukanchi, maima munaskamami pusanchi. Chasa churaspami kaballupa kuirputa maima munaskama ñugpachinchi. ⁴Kanuamandapas iuiariichi, maituku atun kagpipas. Maikanpas kanuata iakupi apakug, maituku sinchi wairakugpipas, uchulla walmullawami pai maima munaskama chi kanuata apachí. ⁵Chasallata nukanchipa simi,^b kuirpupi uchulla iukaspapas, nukanchipa rimaiwa pudirinmi, maituku atunpas tukugsamunga.

Chasallata iuiariichi: asllita nina, sindirispaka, atun ruku sachakunatapas pudinmi puchukanga. ⁶Simipas, ninasina wagllichigmi ka. Chi simiwaka pudirinmi, tukui kai alpapi kaugsanakuskata paipa jiru rimaiwa wagllichinga. Chi simika, nukanchipa kuirpupimi tia. Chi simiwa rimaspaka, runakunapa iuiaitapasmi wagllichigsamú. Chiwami simika infirnumanda ninawa sindichiskasina ka. Chi simillawantami sugkunatapas kaugsankama wagllichingapa pudí. ⁷Sachukupi kaugsagkunata i piskukunata, alpapi aliurispapurigkunata i iakupi kaugsagkunatapas, tukuikunatami runakuna mansuiachii pudinmi i mansuiachinkunallami. ⁸Ikuti simitaka, ñi maikan runapas mana mansuiachii pudinchu. Chi simiwa rimaita mana pudirinchu, imawapas arkangapa. Simika, wañuchidiru wambii jundachiskasiniami ka. ⁹Chi simiwami nukanchipa atun Taita Diusta iapa suma kagta ninchi. Chillawantami runakunatapas mana allilla rimanchi, Taita Dios kikin rigchasina ruraska kagpikunapas. ¹⁰Chi simillawantami allillata i mana allillatapas rimanchi.

Nukapa *kuiaska taitakuna i mamakuna, chasa rimaika mana allilla kanchu. ¹¹Suglla iaku ñawillapika, miski iaku i winja iakuka mana llugsinchu. ¹²Chasallata, nukapa *kuiaskakuna, igus sachapi asiti surkudiru muiukunaka mana tiarinchu. Ñi ubas sachapi igus muiukunaka mana tiarinchu. Chasallata, suglla iaku ñawipika, kachi iaku i miski iakuka mana llugsinchu.

Taita Dios karaska iachaimanda

¹³¿Kamkunapura tianchu tukuipi iachag? Maikan chasa tiagpika, paipa alli suma kaugsaiwa uchullasina tukuspa, kawachichu pai sutipa iacha kagta. ¹⁴Ikuti maikan sugkunata jiru iuiaiwa kawaspa, kikinpura “Nukaka, masmi kani” iuiarikugka, mana suma atuniachiriskasina iuiakuchu, maituku iacha kaspapas. Chasa jiru ruraskawaka kawachikumi, tukuipi llulla kagta. ¹⁵Chi iachaitaka, Taita Dios mana karanchu. Kai alpamandalla runakunapa iuiaila i iaia kukupa iuiachiskallami ka.

^b 3.5-10 griego rimaiwa: kalluwa

¹⁶Maikan sugkunata jiru iuiiwa kawaspa, kikinpura “Nukaka, masmi kani” iuiaripa kaskakunapagpika, piñarispalla i tukui mana allilla ruraspallami kaugsankuna. ¹⁷Ikuti Taita Dios karaska iachaita iukagkunaka, ñi imapi mana pandarispallami kaugsankuna. Chimanda, tukuikunawa sumaglla mana piñachirinakuspallami kaugsankuna. Paikunapa suma iuiiwa tukuikunamandami alli iuiankuna. Ima niskatami uiankuna. Sugkunamanda llakispa, tukui imapias allillami rurankuna. Ñi pitapas mana sug rigcha sug rigcha iuiiwa kawaspa, ñi imapias mana llullaspallami kaugsankuna. ¹⁸Maikan sumaglla pasinsiachispa, tukuikunawa sumaglla kaugsanakug, paikunakar, Diospa ñawipi alli runakunami niraiankuna.

Kai alpapi ima tiaskakunallawa mana iacharingapa niskamanda

4 ¹Kam kikinpura, ñimamandatak makanakui i piñachirinakui tiagsamú? Kam kikinkuna mana suma iuii iukaspami chasa rurankungichi. ²Ima munaskata mana tarispaka, kam kikinpurami wañuchirinakungichi. Sugpata iukangapa munaripa, mana kichui pudispaka, chimandami makanakuspa i piñachirinakuspa kaugsanakungichi. Taita Diusta mana mañaspami kamkuna mana iukangichi. ³Paíta mañaspaka, kam kikinkunamandalla allilla kangapa iuiaripa mañanakugmandami mañanakuskaka mana chaskingichi.

⁴Kamkuna, Diospa ñawipi sug rigsi iukagsinami kangichi. ¿Manachu iachangichi: kai alpapi tiaskakunallawa iacharigka, Taita Diusta wasa churagsinami niraiá? Maikanpas kai alpapi tiaskakunallawa iacharigka, Taita Diospa kuntrami ka. ⁵Chimandachar ñugpamanda librupi kasa willaraiá:

Imasami kusa, warmindita muná, paillawa kangapa;
chasallatami Santu Espíritu nukanchipi kaugsagka,
nukanchita muná, paiwa suglla kagsina kangapa.

⁶*Chiwanka Taita Dioska, alli iuiaikunatami kará; chasaka, nukanchi sumaglla kaugsangapa. Chimandami ñugpamanda librupi kasapas willaraiá:

Iapa atuniachiriska iuiiwa kagkunataka,
Taita Diosmi paikunata piñarí.
Ikuti mana atuniaspalla iuiiwa kagkunataka,
alli iuiaikunatami kará;
chasaka, paikuna sumaglla kaugsangapa.

⁷Chimandaka, Taita Diospa tukuichi, paimandalla kangapa. Iaia kukuta mana sakirispalla michariichi. Chasa ruragpika, chi iaia kukuka kamkunapagmanda mitikungami. ⁸Taita Diospagma mana manchaspalla kaillaiaichi. Chasa ruragpika, paipas kamkunapagma kaillaiangami.

Mana allilla ruragkuna kaspaka, chi mana allillata maillarigsina ruraichi. Kai alpawa i Taita Dioswa sugllapi iuiagkuna, tukui sungupi jiru iuiaita sakiichi, Taita Diospalla kangapa. ⁹Chimandami niikichita: irkiaichi; wakaichi; llakiriichi. Asinakungataka, niikichitami: wakaichi. Suma iuiiwa kuntintulla kangataka,

niikichitami: irkiaspa llakiriichi. ¹⁰Atun Taita Diuspa ñawipi *mana iapa atunia-chirispalla iuiái iukaichi. Chasa ruragpika, Taita Diusmi kamkunata atuniachinga.

¹¹Taitakuna i mamakuna, kamkunapura ñi imapipas *mana jucha-chinakuichi. Maikanpas sugkunamanda juchachispa, mana allilla rimakugpika, Taita Dius ima rurangapa willaskamanda mana allilla rimagmi niraiá. Chasa ruraspaka, Taita Dius imasa willaskasina rurag kangataka, kikin justisia kagsinami tukú. ¹²Suglla Taita Diusmi tia, runakuna imasa rurangapa nidur. Paillatatami justisia kangapa ka. Paimi pudí kispichingapa u puchukangapa. Nigpi kamka, ípitak kangí, justisia tukuspa, kamba waugkindikunamanda mana allilla rimakungapa?

Kaia ima pasaringapa kaskata mana iachaskamanda

¹³Kunaura uiawaichi, kamkuna kasa nigkuna: “Kuna puncha u kaia, chi puiblumami risunchi. Randispa katuspa, sug watami chipi chisiasunchi, kulki mirachinkama”. ¹⁴Kamkunaka mana iachangichichu, ñi kaia ima pasaringapa kagta. Nukanchipa kausai, puiusinami ka; imasami puiuka, kawaripa, sug mana unailapika ikuti mana kawarí: chasa. ¹⁵Mas allimi kantra, kamkuna kasa ningapa: “Atun Taita Dius munagpika, nukanchi, kausaspa, kasa u chasami rurasunchi”. ¹⁶Chasa ningataka, kamkuna atun tukuspami rimanakungichi. Chasa atun tukuspa iuiagkunaka, mana allilla rurankunachu. ¹⁷Maikanpas, allilla rurangapa iachaspapas, mana ruragpika, pandarigmi ka.

Iapa iukagkunata iuiachiskamanda

5 ¹Kamkuna iapa iukagkuna, kaparipa wakaichi. Kamkunata iapa llakiimi chaiangapa ka. ²Kamkuna tukui iukaskaka, Diuspa ñawipi ismuskasinami kawarí. Kamkunapa suma katangakunapas, pulilla mukuskasinami ka. ³Kamkunapa kuri i kulkipas, lim wakariskasinami niraiá. Chi wakariskaka kawachikumi, kamkuna tukuipi pandariska kagtakuna. Chi wakariskaka, kamkunapa aichata nina tukuspa rupachigmi tukungapa ka. Chi iukaikuna wakachiriskakunaka, kai alpa tukurii punchakuna Taita Diuspa rabia wakachirigsinami niraiá.

⁴Kamkunapa piunkunata mana allilla pagaskamanda, chi kulkikunallatatami kamkunamanda mana allilla ruranakuskata willaku. Chi piunkuna llakiywa kaparinakuskata, tukui manduiug atun Taita Diusmi uiaku. ⁵Kamkuna, kai alpapi suma mikuspa i upiaspa, imasa munaskasina kausaspaka, wagra wiraiaskasinami tukungichi. Chasaka, ñami wira wagrata wañuchii puncha chaiakugsina kamkunata chaimuku. ⁶Kamkuna, mana allilla justisiaspallami alli runakunata wañuchingichi. Paikunaka, mana micharirkakunachu.

Iaia Jesús samunkama, upalla mana sambiaspalla suianakuskamanda

⁷Taitakuna i mamakuna, Iaia Jesús samunkama, upalla mana sambaiaspalla suianakungichi. Chagra rurag runata iachaikuichi. Paika, tarpuskata

manara pallankama, iukanmi mana sambaiaspalla suianga, ñugpa tamia i kati tamia *ialinkama. ⁸Chasallata kamkunapas, Taita Dioswa iuiariilla kaspasuiangichi, mana sambaiaspalla. Iaia Jesuska, ñami chaiagsamungapa ka.

⁹Taitakuna i mamakuna, kam kikinpura mana piñachirinakuspalla kaugsaiichi. Chasaka, mana justisiai tukunkangichichu. Taita Dios justisiag, ñami punguma chaiamukugsina ka.

¹⁰Taitakuna i mamakuna, Santu Ispirituwa ñugpata rimagkunata iachaikuichi. Paikuna, atun Taita Diospa Rimaita willaspami karkakuna. Llakii iukaspapas, mana sambaiaspallami kaugsarkakuna. Kamkunapas chasallata kaugsaiichi. ¹¹Maikanpas, llakiiwa kaspapas, mana sambaiaspalla kaugsagkunamandaka ninchimi: “Taita Diospa iapa kuiaskami ka”. Job suti runa, iapa llakiiwa kaspapas, mana sambaiaspalla kagmanda ñami iachangichi. Paita, katima, atun Taita Dios tukuimi kutichirka. Atun Taita Dioska, nukanchita iapa kuiaspa, llakiiwami kawaku.

¹²Taitakuna i mamakuna, imasa kaskata *mana kawag churangichi sug luarta, ñi kai alpata ñi ima sutikunatapas. “Ari” ningapa chaiagpika, “Ari” ningichilla. “Mana” ningapa chaiagpika, ningichilla: “Mana”. Chasa nis-paka, mana justisiai tukunkangichichu.

Taita Diusta mañaimanda

¹³Maikanpas llakii iukaspaka, Taita Diusta mañangichi. Maikan kuntintulla kaspaka, Taita Diusta birsiuwa kantangichi, “Kam, iapa allimi kangi” nispa.

¹⁴Maikan ungug kaspaka, Jesuswa tukusapura iacha taitakunata kaiangichi; Taita Diusta mañapuspapa, Iaia Jesusmanda iuiarispapa, asitiwapa paita kakuchukuna.

¹⁵Iaia Jesuswa suma iuiarispapa mañapugpikunaka, paimi, chi ungugta aliachispapa, atarichingapa ka. Chi ungug ima pandariskakunatapasmi pasinsiai tukungapa ka.

¹⁶Chimandami niikichita: kam kikinpura ima pandariskakunata willarinakungichi. Kam kikinpuramanda mañapunakungichi, Taita Dios kamkunata aliachichu.

Allilla rurag runa, tukui suma iuiaiwapa mañaskawaka tukuipi iapami pudirí.

¹⁷Elías suti Santu Ispirituwa ñugpamanda rimag, paimi, nukanchisinallatata kaspapa, Taita Diusta: “*Mana tamiachu” suma iuiaiwapa mañarka. Chiuraka, sutipami kimsa wata sugta killa kai alpapi mana tamia urmarka. ¹⁸Ikuti tamiangapapa mañauraka, chasallatami tamiagsamurka. Chiura, alpapika ikuti tukui mikuimi tiarigsamurka.

¹⁹Nukapa taitakuna i mamakuna, kasa iuiariichi: kamkunapuramanda maikanpas mana allillapi urmagpika, chi runataka sug runawa iuiachingichi, Taita Dioswa ikuti tigrangapa. ²⁰Kasa iachaichi: chi pandarikuskata kispichig, chi runapa almatami kispichingapa ka, mana diltudupa wañungapa. Chasallata, chi tukui pandariikunatapasmi pasinsiachingapa ka.